

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 5
Marso 7, 2010
www.philippinerevolution.net

Editorial

Mga epekto ng El Niño, pinasisidhi ng bulok na sistema at mga patakaran

Kalilipas lamang ng magkasunod na sakuna, dagdag na pinsala at paghihirap na naman ang dinaranas ng mamamayang Pilipino, laluna ng masang magsasaka. Ito ay bunga ng mas maaga, matindi at mahabang tagtuyot na dala ng El Niño.


Kakaibang sidhi ang epekto nito sa mamamayan dahil sa pag-iral ng bulok na naghaharing sistema at mga anti-mamamayang patakarang nagbibigay-daang sa pandarambong ng malalaking kapitalistang dayuhan, kumprador at burukrata. Masahol pa, hindi lamang naging pabaya at inutil ang mga naghahari sa harap ng kalamidad, sinasamantala pa nila ito ngayon para pakinabangan nila at ng kanilang mga kasapa-

kat. Pangunahing pinipinsala ngayon ng tagtuyot ang umaabot sa 750,000 ektaryang mga sakahan, palaisdaan at mga hayupan na nakasalalay sa patuloy na suplay ng tubig. Kabilang dito ang mga prubinsya sa Northern Luzon na napinsalaan ng matitinding bagyo nito lamang huling bahagi ng 2009. Tinatayang P10-20 bilyong halaga ng mga pananim, palaisdaan at alagang hayop ang mapipinsala sa mga darating na buwan.

Ang sidhi ng epekto ngayon ng tagtuyot ay ibinubunsod pangunahin ng matagal nang pagkawasak ng mga likas na rekurso ng tubig. Nangatuyo o nangababaw ang mga ilog, bakawan, sapa, balon at iba

pang tubigan dahil sa malawakang pagdambong sa mga bundok at kagubatan ng malalaking kumpanya sa pagmimina at pagtotroso. Sa gayo'y walang magamit na reserbang tubig ang masang magsasaka para sa mga taniman, palaisdaan at pag-aalaga ng hayop.

Malala pa, ang tubig na naiipon sa mga dam na nagagamit noon sa irigasyon ay ipinagkakait ngayon ng malalaking kapitalistang nagmamay-ari nito. Tumatanggi ang mga ito na magpakawala ng tubig dahil ang limitado nang suplay ay ipinaprayoridad nila sa produksyon ng kuryente na siyang pangunahin nilang pinagkakakitaan. Walang pakialam ang mga ito sa salan-



Mga tampok sa isyung ito...

Industriya ng biofuels, pinagpipistahan
PAHINA 5

Pabuya sa mga nag-aresto sa Morong 43, binatikos
PAHINA 7

2 aksyong militar sa Bulacan
PAHINA 10

tang idinudulot ng tagtuyot sa mga lupang agrikultural.

Ang operasyon ng dam pangu-nahin para makapagkamal ng tubo ay resulta ng pagsasapribado ng mga ito alinsunod sa mga patakaran dikta ng mga imperyalista sa balangkas ng liberalisasyon, denasyunalisasyon, pribatisasyon at deregulasyon. Makaraang isabatas ng papet na rehimeng Arroyo noong 2001 ang Electric Power Industry Reform Act (EPIRA), ang operasyon ng halos lahat ng malalaking dam sa bansa ay naibigay na sa malalaking dayuhang kumpanya at mga kasosyo nilang kumprador.

Habang binibigyang-laya ang mga dayuhan at malalaking negosyante na mandambong at magpakasasa sa tubo, tuluyan namang pinababayaan ng mga naghahari sa bansa ang interes ng mamamayan at hinahayaang mabulok ang lokal na ekonomya. Tumatampok ang tuluy-tuloy na pagkaatrasado ng agrikultura sa bansa sa kapinsalang idinudulot ng matinding tagtuyot ngayon.

Partikular na tampok ngayon ang labis na kakulangan at kabuluhan ng mga pampublikong imprastrukturang pang-irigasyon. Wala pa

sa kalahati ng mga palayan sa buong bansa ang inaabot ng irigasyon. Ang nakararaming mahihirap na magsasaka ay umaasa na lamang sa ulan. Kalakhan pa ng mga nakatayo nang pampublikong imprastruktura para sa irigasyon ay hindi naman mapakinabangan. Wala pa sa kalahati ng mga ito ang may dumadaloy na tubig. Ang pondong para sana sa pagkukumpuni ng mga ito ay ibinubulsa ng tiwaling malalaking burukratang kapitalista.

Samantalang matagal nang inasahan ang pagdating ng El Niño, walang anumang ginawang paghahanda rito ang reaksiyunaryong rehimen. Kulang na kulang at hulinghuli na ang mga hakbangin ng naghaharing rehimen upang alalayan ang masang magsasaka ngayong panahon ng tagtuyot. Hindi ginagamit ng rehimen ang kapangyarihan nito para obligahin ang mga opereytor ng mga dam na maglaan at magpalabas ng tubig para sa irigasyon. Wala nang epekto ngayon at pagtatapon lamang ng pera ang ginawa nitong *cloud-seeding operation*. Nagkakasya na lamang ito sa mga pakitang-taong pakulo tulad ng pamamahagi ng pailan-ilang poso at tubo ng tubig at paglala-

bas ng pondong subsidyo umano para sa binhi at abono. Ginagamit pa ito para sa kampanya sa eleksyon ng mga kandidato ng naghaharing pangkatin.

Masahol pa'y sinasamantala ngayon ng gubyernong Arroyo ang kalamidad ng tagtuyot upang pagibayuhin ang liberalisasyon ng importasyon ng bigas, mais, at pakain sa hayop. Ang importasyong dumaraan sa National Food Authority (NFA) ay matagal nang pinagkukunan ng malaking kurakot. Palalala-in pa ito ngayon ng pagbubukas ng importasyon sa mga papaborang malalaking negosyante. Ibibigay rin nito sa malalaking negosyante ang ibayong kontrol sa presyo at suplay ng bigas at iba pang mga produkto.

Dagdag na pinsala naman ang idudulot nito sa masang magsasaka at mamamayang Pilipino. Sa isang banda, ang balak na importasyon ng tatlong milyong metriko toneladang bigas ay pinangangambahang lalong magpapabagsak sa presyo ng lokal na palay na magdudulot ng ibayong pagkalugi ng masang magsasaka. Sa kabilang banda, dahil lubusan nang makokontrol ng malalaking kumprador ang suplay ng bigas, asahang sasamantalain nila ang bawat pagkakataon para muling pasiritin ang presyo nito sa pamilihan.

Sa harap nito, kailangang-kailangan ngayon ang malawakang pagkilos ng mamamayang Pilipino upang mariing batikusin ang naghaharing reaksiyunaryong estado sa kawalan nito ng paghahanda, sa kapabayaan, sa katiwalian at sa kasakimang samantalain pa ang kalamidad. Dapat igiit ng mamamayan ang nararapat para sa kanila at singilin ang mga naghahari sa pananagutan ng mga ito sa malubhang mga pinsalang lumalatay ngayon sa mamamayang sadlak sa matinding kahirapan at kagutuman.

Samantala, kailangan ding pag-



Taon XLI Blg. 5 Marso 7, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial:

Mga epekto ng El Nino, pinasisidhi ng bulok na sistema at patakaran	1
Mga kaugnay na balita	3
Biofuel, pinagpipistahan ng mga kapitalista	4
Ang TVDAC	5

Pananalanta ng pasistang estado

Pabuya sa mga nang-aresto sa Morong 43	6
Kontra-minang akbista, pinatay	6
Panggigipit sa mga magsasaka sa Negros	7
Lider-estudyante, hinaras	7
Masaker sa Luisita: Wala pang hustisya	8
Maniobra ng angkang Ampatuan	9

Matatagumpay na opensiba ng BHB

Aksyong militar sa Bulacan	10
Mga ambus ng BHB	11

Balita

11

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

handaan ang epektibong paglaban sa posibleng paggamit ng naghaharing rehimen ng "emergency rule" at ibayong dahas sa harap ng lalong paglala ng sitwasyon at pagkilos ng mamamayan.

Dapat puspulang isulong ang rebolusyonaryong pakikibaka na siyang tanging mapagpasyang magwawakas sa paghihirap ng mamamayan sa ilalim ng naghaharing bulok na rehimen at atrasadong sistemang panlipunan.

Tawag ng panahon ang ibayong sigla sa pagsusulong ng reporma sa lupa, kilusang kooperatiba, iba't ibang anyo ng tulongan at iba pang pagkilos para sa kagyat at mas matagalang kapakanan ng mamamayan sa loob at paligid ng mga rebolusyonaryong erya.

Bahagi ng responsibilidad ng Partido at Bagong Hukbong Bayan (BHB) at ng mga demokratikong organo ng kapangyarihang bayan ang pagpapamalas ng epektibong pamumuno sa masa sa pagharap sa kalamidad. Sa kanilang pamumuno, maagap na kumikilos ngayon ang mga rebolusyonaryong pwersa at organisadong mamamayan, laluna sa mga lugar na apektado ng masidhing tagtuyot, upang sa iba't ibang paraan ay maharap ang matitinding epekto nito laluna sa kanilang produksyon.

Pinakikilos ang masa sa mga rebolusyonaryong erya, katuwang ang mga yunit ng BHB upang pagtulung-tulungan ang pag-aayos ng mga sistema ng komunal na patubig, kabilang na ang pagtatayo ng mga bago at pagkukumpuni ng mga sirang sistema ng irigasyon. Kabilang din sa mga pagsisikap na ito ang pagtatayo ng maliliit na komunal na dam at paghuhukay ng mga balon. Pinag-aaralan din ang pagbaling sa mga pananim na kanyang mabuhay sa kabila ng kakulangan ng tubig at tindi ng init, gayundin ang iba pang mga alternatibong mapagkakakitaan. AB

Kapabayaang estado sa mga magsasaka't mangingisda, tinuligsa

TINULIGSA ng mga magsasaka at mga mangingisda ang kapabayaang ng gubyernong Arroyo sa harap ng lumalalang epekto ng mahabang tagtuyot dala ng El Niño. Nitong Marso 5, naglunsad ng piket sa tanggapang ng Department of Agriculture (DA) ang 300 magsasaka, na karamihan ay galing pa sa malayong probinsya ng Cagayan. Kanilang binatikos ang mabagal na aksyon ng ahensya sa kinakaharap nilang problema na nakasisira na ng kanilang produksyon. Anila, wala pa silang natatanggap na tulong mula sa ₱1.7 bilyong pondo ng DA para sa mga sinasalanta ng El Niño.

Ang kilos-protestang ito ay bahagi ng isang linggong serye ng mga aksyong masang isinasagawa ng mga progresibong organisasyon tulad ng Kilusang Magbubukid ng Pilipinas (KMP), Pambansang Lakas ng Kilusang Mamamalakaya ng Pilipinas (PAMALAKAYA) at Bagong Alyansang Makabayan (BAYAN) para igiit sa gubyernong Arroyo na ipamahagi na ang naturang pondo.

Noong Marso 2, unang nagda-

os ng piket sa DA ang 200 mangingisda mula sa mga komunidad ng Laguna de Bay. Nagtambak sila ng mga *water lily* sa harapan ng gusali ng DA at binatikos si DA Secretary Arthur Yap sa hindi pagpapalabas ng pondo na nakalaan sa mga sinalanta ng El Niño. Anila, dapat ilabas na ang pondo para mabawasan ang epekto ng mahabang tagtuyot na nagpapababa na sa lebel ng tubig ng 90,000 ektaryang Laguna de Bay. AB

Pondo para sa irigasyon, limas na

SA loob ng siyam na taon sa ilalim ng paghaharing Arroyo, walang inunlad sa irigasyon. Ito ay sa kabila ng paglalaan dito ng pinakamalaking bahagi (33%) ng badyet ng Department of Agriculture.

Sa pagsisiyasat ng Kilusang Magbubukid ng Pilipinas (KMP) sa ₱3.7 bilyong pondong inilaan umano sa pagkukumpuni ng mga sistemang irigasyon noong 2007, iniulat ng lahat ng tsapter nito sa lahat ng rehiyon sa bansa na walang isinagawang pagkumpuni sa mga irigasyon o pagpondo dito ng National Irrigation Administration. Natuklasan din na ang halos buong pondong ito ay ginamit sa kampanya ng mga kandidato sa eleksyon ng pangkating Arroyo noong 2007. AB

Krisis sa enerhiya, sinasamantala

DAHIL sa lubhang kakulangan ng suplay ng tubig sa mga dam, pumapalya ang operasyon ng mga *power generator* at kinukulang ang produksyon ng kuryente laluna sa Mindanao. Balak ng rehimen ng US-Arroyo na samantalain ang sitwasyon para magdeklara ng krisis sa enerhiya at magpatupad ng "emergency powers," sa basbas ng Electric Power Industry Reform Act (EPIRA).

Katulad ng nangyari noong panahon ng rehimen ng Ramos, tiyak na malaki na naman ang ibubulsa ng mga tiwaling upisyal ng rehimen sa pagpapatayo at pag-upa ng mga karagdagang kapasidad para sa pagluwal ng kuryente. Tinatayang gugugol ang gubyerno ng hanggang ₱10 bilyon para rito. Ibayo nitong pahihigpitin ang kontrol ng mga pribadong kumpanya sa produksyon ng kuryente at lalo itong magpapataas sa bayarin sa kuryente. AB


Nagpipista ang mga lokal at dayuhang kapitalista sa industriya ng *biofuel*

Nagbubunsod ng malawakang pangangamkam ng lupa at pandarambong sa likas na kayamanan ang pagkukumahog ng mga dayuhan at lokal na kapitalista na mamuhunan sa produksyon ng *biofuel* sa bansa. Dahil dito ay lumalakas ang pagtutol at paglaban ng iba't ibang sektor ng mamamayan sa mga proyektong *biofuel* na itinutalak mismo ng gubyernong Arroyo.

Batay sa datos ng Philippine Agricultural Development and Commercial Corp. (PADC) noong Setyembre 2009, mayroon nang 40 dayuhan at lokal na kumpanyang namuhunan ng P83 bilyon sa 49 na proyektong *biofuel* sa bansa mula pa noong 2007. Ang P40.8 bilyon dito ay ginamit sa pagbubukas ng mga plantasyon ng *jathropa* (tubatuba), kamoteng kahoy, niyog, tubo, *hybrid* na mais, palay at *sorghum* at ang P42.5 bilyon ay ginamit sa pagtatayo ng mga planta sa pagpoproseso.

Ang nasabing mga dayuhang kumpanya at mga lokal na kasosyo nila ay kumokontrol ngayon sa mahigit apat na milyong ektarya ng lupain sa iba't ibang bahagi ng bansa kung saan matatagpuan ang kanilang malalawak na plantasyon at mga distileriya. Halimbawa, ang Pacific Bio-Field Corporation ng Japan ay kumokontrol ng 600,000 ektaryang lupain sa Ilocos Norte. Samantala, sa silangang bahagi ng hilagang Luzon, ang LA Investment Capital ng US ay nagtayo ng mahigit 100,000 ektaryang plantasyon ng *jathropa* sa mga prubinsya ng Cagayan, Isabela, Nueva Vizcaya, Qurino, Nueva Ecija at Quezon. Sa iba't ibang bahagi ng Mindanao, ang NRG Chemical Engineering, isang British na kumpanya ay kumokontrol ng mahigit isang milyong ektaryang plantasyon ng *jathropa* at ang Abundant Resources Corporation, isang kumpa-

nyang Amerikano ay kumokontrol sa mahigit 100,000 ektaryang plantasyon ng *jathropa* sa Bukidnon. Hanggang sa kasalukuyan, nagpapatuloy ang rehimeng Arroyo sa pagtukoy ng mga lugar na pagtatayuan ng isang milyong ektaryang plantasyon ng *hybrid* na palay, mais at *sorghum* para sa mga Tsinong kumpanya ng *biofuel*. Nakasaad ito sa mga probisyon ng 11 kasunduan na nilagdaan ng rehi-




meng Arroyo at China noong 2007 kapalit ng hinihingi nitong pangtang.

Ang mga imperyalistang bansa tulad ng US, Japan at mga myembro ng European Union ang nagtutulak ng paglawak ng industriya ng *biofuel* sa Pilipinas. Sinakyan ng malalaking kapitalista ang panawagan para sa alternatibong panggatong sa harap ng pangunahin nilang responsibilidad sa pandaigdigang pagbabago ng klima.

Alinsunod naman sa dikta ng imperyalistang US, maamong ipinatupad ng rehimeng Arroyo ang Biofuel Act of 2007. Nakasaad sa naturang batas na lahat ng gasolinang ibebenta sa loob ng bansa ay dapat haluan ng 10% *ethanol* pagsapit ng 2010 at ang mga sasakyan namang gumagamit ng krusdo ay dapat na ring gumamit ng *biodiesel*.

Pagtutol at paglaban ng mamamayan. Ang Pambansang Lakas ng Kilusang Mamamalakaya ng Pilipinas (PAMALAKAYA) ay pormal na naggiit sa gubyerno ng Japan noong Hulyo 2009 na ibasura ang 600,000-ektaryang proyektong *biodiesel* ng Pacific Bio-Diesel Corp. sa bayan ng Pagudpud, Ilocos Norte at ang Japan-Philippines Economic Partnership Agreement (JPEPA) na siyang balangkas ng proyektong ito. Nag-apela rin ang Catholic Bishops' Conference of the Philippines (CBCP) sa gubyernong Arroyo na ibasura ang nasabing proyekto dahil pinagkakaitan nito ng lupa ang maliliit na mangingisda at magsasaka na wala o kulang ng lupa.

Batay sa napagkasunduan, ang kumpanyang *biodiesel* ng Japan at ang lokal na kasosyo nito ay magdedeliber ng mga produktong *biodiesel* para sa konsumo ng publikong Hapones at hindi sa mga Pilipino. Ani Fernando Hicap ng PAMALAKAYA, sa halip na magpatupad ang gubyernong Arroyo ng tunay



na repor-
mang agra-
ryo para sa
masa ng
magsasa-
kang Pilipi-
no na 70%
ay kulang o
walang lu-
pang sina-
saka, pina-
hihintulu-
tan nito ang
Japan na
upahan
nang 25 ta-
on ang ma-
lalawak na
lupain. May

opsyon din ang Japan na pala-
wigin pa ang kontrata nang 25
taon pa.

Binatikos din ni Archbishop
Angel Lagdameo, dating presi-
dente ng CBCP ang proyekto da-
hil ang 600,000 ektaryang lupa-
in para rito ay mahigit kalahati
na ng buong target ng CARP
(Comprehensive Agrarian Reform
Program) ng guberno.

Bago ito, noong 2008 ay ibi-
nunyang at mariing nilabanan ng
mga mamamayan ng ikatlong dis-
trito ng Negros Oriental ang Tam-
lang Valley Agricultural Develop-
ment Corp (TVADC) bilang instru-
mento sa pangangamkam ng lupa
ng malalaking burges kumprador
at panginoong maylupa sa pru-
binsya. Pinamunuan ang protesta
ng District Farmers Alliance
(DFA), isang alyansa ng mga mag-
sasaka sa naturang distrito. (*Ting-
nan ang kaugnay na artikulo.*)

Sa harap ng malawakang pa-
ngangamkam ng lupa na naga-
ganap gamit ang mga proyektong
biofuel, walang ibang magagawa
ang mamamayan kundi ang tu-
luy-tuloy at mahigpit na pagbu-
bunyang at paglaban sa kontra-
magsasaka at kontra-mamama-
yang batas na ito. **AB**

Ang Tamlang Valley Agricultural Development Corporation

Ang Tamlang Valley sa Negros Oriental ay isa sa mga tukoy na lugar sa
buong bansa kung saan unang ipinatupad ang proyektong *biofuel*.
Nagtayo rito ng distileriya at plantasyon ng *jathropa* at kamoteng kahoy
at pinondohan ito ng ₱2 bilyon. Saklaw nito ang 24,116 ektaryang lupa-
in sa iba't ibang baryo at sityo ng mga bayan ng Siaton, Valencia, Sibul-
an at Sta. Catalina. Kaugnay ng proyektong ito ay mayroon ding itina-
tayong planta sa enerhiya sa San Carlos City, Negros Occidental na pina-
ngangasiwaan ng San Carlos Bioenergy Corp. na may pondong ₱1.8 bil-
yon.

Para ipatupad ang nasabing
proyekto ay binuo ang Tamlang
Valley Agricultural Development
Corp. (TVADC) sa pangunguna ni
dating Congressman Herminio
Teves at kasosyo nitong si Julio Sy.
Ang 65% ay pag-aari nina Teves at
Sy samantalang ang 35% nito ay
pag-aari ng lokal na guberno. Sa
pamamagitan ng impluwensya niya
sa pulitika, umupa si Teves sa DENR
ng 24,116 ektaryang lupain noong
2006 at inaprubahan ito nang hin-
di dumadaan sa pampublikong pag-
dinig.

Ang mga magsasaka ay pinapa-
pasok sa dalawang kasundu-
an—*contract farming* at *corporate
farming*. Sa kasunduang *contract
farming*, pinapautang ng ₱15,000
bawat ektarya ang mga magsasaka
para magkaroon umano sila ng
panggastos sa pagtatanim. Tuwing
anihan ay bibilhin ng TVADC ang
produkto nila at ang bayad dito
ang siyang pagmumulan ng pamba-
yad ng magsasaka sa kanyang
utang.

Sa *corporate farming* naman,
ang lahat ng gastos ay aakuin ng
TVADC at uupahan nito ang lupa sa
may-ari ng lupa o sa guberno ng
₱500 lamang bawat ektarya kada
taon. Kung magtatrabaho ang mga
magsasaka sa lupa ay suswelduhan
sila ng ₱160 bawat araw.

Para masiguro ang pagpapa-
tupad ng nasabing proyekto at ma-
supil ang pagtutol ng mga residen-
te, mula pa noong Hulyo 26, 2007

ay kinakasangkapan na ng kumpa-
nya ang 61st IB Bravo Company ng
AFP, mga elemento ng CAGU at
mga ahenteng paniktik upang mag-
lunsad ng mga sustenidong opera-
syon.

Hanggang sa kasalukuyan ay
pilit na ipinatutupad ang nasabing
proyekto kapalit ng pagdurusa ng
mga magsasaka. Sobrang hirap at
dislokasyon ang dinaranas ng mga
magsasaka dulot ng hayagan at li-
gal na pangangamkam ng lupa. Ha-
limbawa, kung hindi sila makaba-
yad ng utang ay pwede nang ma-
kumpiska ang kanilang lupain. Wa-
la na rin silang karapatang kontro-
lin kung ano ang itatanim dito at
sa kahuli-hulihan ay nagiging
manggagawang bukid na lamang
sila sa sarili nilang lupa. Dagdag
pa, laganap din ang paglapasta-
ngan sa karapatang-tao na ginaga-
wa ng mga pasistang militar.

Mula noong ikalawang bahagi
ng 2008 ay nagsimula nang mag-
buklud-buklod ang mga magsasaka
rito para labanan ang naturang
proyekto. Naglulunsad sila ng ma-
laganap na kampanyang edukasyon
tungkol sa naturang isyu. Nagbuo
ang mga magsasaka ng iba't ibang
organisasyon at naglunsad ng sa-
ma-samang pagkilos tulad ng paki-
kipagdayalogo, pulong-pulong, pe-
tisyon, rali at iba pa. Iginigiit nila
ang pagpapatupad ng tunay na re-
porma sa lupa bilang natatanging
solusyon sa problema sa lupa ng
mga magsasaka. **AB**



Pabuya sa mga nang-aresto sa Morong 43, binatikos

Tulad ng inaasahan, pinuri at ginantimpalaan ng Armed Forces of the Philippines (AFP) ang mga upisyal nitong iligal na nang-aresto ng 43 manggagawang pangkalusugan noong Pebrero 6 sa Morong, Rizal habang nagsasagawa ng pagsasanay-medikal. Inakusahan ang mga biktima na mga myembro raw sila ng Bagong Hukbong Bayan (BHB) at nagsasagawa umano ng treyning sa paggawa ng bomba.

Mariing kinundena ng Health Alliance for Democracy (HEAD), mga pamilya ng tinaguriang “Morong 43,” mga simpatisador nila at mga militanteng mambabatas ang paggawad ng militar ng mga medalyang Bronze Cross, pangapat na pinakamataas na pabuyang militar kina Col. Aurelio Baladad at Lt. Col. Jaime Abawag noong Pebrero 23 sa Camp Nakar, Lucena, Quezon.

Anila, ang iligal na pagreyd at paghuli sa 43 manggagawang pangkalusugan at ang kasunod na mga pagtortyur at paglabag sa karapatang-tao ng mga biktima ay lantad na pagbalewala sa tamang proseso at dapat batikusin. Sa halip na bigyan ng pabuya o mga medalya ang mga upisyal ng militar na lantarang lumalabag sa mga karapatang-tao, sila ay dapat kasuhan at ikulong.

Matagal nang patakaran ng reaksyunaryong rehimeng US-Arroyo ang paggawad ng pabuya sa mga lantarang lumalabag ng karapatang-tao. Matatandaang pinuri at agarang binigyan ng promosyon ni Gloria Arroyo si Gen. Jovito Palparan, Jr. noong 2006. Mula koronel, nabigyang-promosyon si Palparan bilang *brigadier general* noong 2003, at naging *major general* noong 2004. Sa kabila ng kanyang rekord bilang masugid na tagapagpatupad ng mga ekstrahudisyal na pamamaslang sa mga lu-

gar kung saan siya itinatalaga, ginawa siyang hepe ng 8th ID sa Eastern Visayas at hepe ng 7th ID sa Central Luzon. Sa kanyang 2006 State of the Nation Address ay walang kahihyang pinuri pa ni Arroyo ang naturang berdugo.

Nabigyan din ng promosyon bilang koronel ang mga dumukot sa aktibistang si Jonas Burgos na sina Noel Clement, Melquiades Feliciano at Edison Cagal. Ang iba pang mga elemento ng militar na nabigyan ng pabuya o medalya at ipinadala sa mga paaralang militar sa ibayong dagat dahil sa pagpapatupad nila ng mga kautusang lantarang lumalabag sa karapatang-tao ay sina Gen. Delfin Bangit, pinuno ng ISAFP nang mangyari ang iskandalong “Hello Garci” at Col. Oscar Lactao, dating hepe ng yunit na siyang nagmasaker sa siyam na magsasaka sa Kananga, Leyte noong Abril 2003. **AB**



Aktibistang kontra-mina, pinaslang sa Cagayan

Hindi na nakaabot sa kanyang bahay si Gensun Agustin, 30, matapos siya pagbabarilin hanggang sa mapatay noong hapon ng Marso 1 sa Barangay Calamegatan, Buguey, Cagayan. Si Agustin ay kasapi ng Alliance for Buguey Community Advocates (Albucada) at ng Federation of Anti-Mining Advocates in Cagayan (Famac), mga organisasyong kumakalaban sa iligal na pagmimina sa lalawigan. Pauwi na sana si Agustin sakay ng kanyang motorsiklo nang pagbabarilin siya ng dalawang tao na sakay din ng motorsiklo.

Kalaban nina Agustin ang mga nagmimina ng *magnetite* sa prubinsya. Ang *magnetite* ay kinukuha mula sa itim na buhangin sa mga baybayin ng Cagayan. Pinangangambahan ng mga aktibistang maka-kalikahan na malalagay sa peligro ang lalawigan sa patuloy na pagkuha ng *magnetite* dahil ito ang elementong nagbubuklod sa mga buhangin. Malamang na maging sanhi ng mga pagbaha sa prubinsya ang pagkawala ng *magnetite* na ito.

Samantala, kinundena ng KARAPATAN-Negros at alyansang September 21 Movement ang tangkang pamamaslang kay Ronaldo Capitanena, 23, *public information officer* ng Camindangan Small Farmers Association (CASFA), na kaanib ng Kilusang Magbubukid ng Pilipinas (KMP). Itinuturong mga salarin sa pinakahuling harasment na ito ang *death squad* ng 61st IB ng Philip-

“Aktibista..,” sundan sa pahina 7



"Aktibista..." mula pahina 6

pine Army.

Binaril si Capitanea ng dalawang naka-*bonnet* na lalaki noong Pebrero 22 sa Hacienda Mabuhay, Barangay Gil Montilla, Sipalay City, Negros Occidental. Sakay siya noon sa kanyang motorsiklong "habal-habal" para sunduin ang regular niyang pasaherong guro nang pagbabarilin siya ng dalawang taong nakasakay sa

isang itim na motorsiklong DT. Nasa ospital ngayon sa Bacolod City ang lider-magsasaka at nagpapagaling sa tinamo niyang suhat.

Ayon kay Fred Caña, pangkalahatang kalihim ng KARAPATAN-Negros, ang pamamaril kay Capitanea ay bahagi ng sistematikong kampanya ng militar na patahimikin ang mga kasapi ng mga progresibong organisasyon. **AB**

Panggigipit sa mga magsasaka sa Negros Occidental

Mariing binatikos ng KARAPATAN-Negros ang patuloy na harasmentong mga *security guard* at pribadong *goons* sa mga magsasakang kasapi ng Pakigdaet sa Kalambuan sa Sitio Kambayugo, na kaanib ng National Federation of Sugar Workers (NFSW). Kaugnay sa lupa ang paggigipit na ito ng mga armadong grupo ng pamilyang Lumayno sa Barangay Minautok, Calatrava, Negros Occidental.

Sinaktan at pinaputukan ni Raul Baterna ang magkapatid na Cresensia Jumawan at Lucia Nativo noong Pebrero 19 sa Sityo Minauyahan. Si Baterna ay dating kasapi ng Philippine Constabulary (ang pinalitan ng Philippine National Police) at tauhan ng mga Lumayno.

Tinutulan nina Jumawan at Nativo ang pagsira ng traktora ng mga Lumayno sa mga tanim nilang halamang ugat. Bunsod nito, sinuntok ni Baterna si Jumawan sa leeg. Ayon sa mga nakasaksi ng insidente, ilang beses ding nagpapatok ng kanyang maikling baril si Baterna. Nagtangkang sumaklolo si Nativo sa kanyang kapatid ngunit binugbog din siya ng limang tauhan ng Jacua Security Agency at ni Baterna. Upang walang makalapit na mga taumbarayo, nagpapatok ng kanilang mga baril ang mga gwardya ng Jacua

habang patuloy ang pagsira ng traktora sa mga pananim.



Ayon sa KARAPATAN-Negros, maraming kaso ng paglabag sa karapatang-tao ang pamilyang Lumayno noong nakaraang taon. Isa rito ang pagpatay sa magsasakang si Reynaldo Bucaling at sa an-

im na kalabaw na pag-aari ng mga residente sa lugar. Noong Enero 15, 2010 ay nagpapatok ng kanilang mga baril sina Rodolfo Lumayno, barangay kapitan ng Minautok kasama ang mga gwardya ng Jacua para takutin ang mga magsasaka at pigilan silang magbungkal noon sa lupa.

Naulit ang mga pang-aabusing ito noong Pebrero 6, 7 at 9. Bukod kay Baterna at mga gwardya ng Jacua, kasama sa mga nagharas ang mga elemento ng bandidong Revolutionary Proletarian Army (RPA). **AB**

Mga lider-estudyante, hinaras ng militar

HINARAS ng militar si Chaser Soriano, nasa-ika-4 na taong estudyante ng Psychology sa Polytechnic University of the Philippines (PUP) sa Sta. Mesa, Maynila. Kandidato rin siya sa pagkapangulo ng Central Student Council sa PUP sa ilalim ng Sandigan ng Mag-aaral para sa Sambayanan (SAMASA) at tagapangulo ng Anakbayan-PUP.

May ilang linggo na sinusundan si Soriano ng di-unipormadong militar. Isang araw, nang makita niya ang bumubuntot sa kanya ay biglang sumenyas ito na parang tumututok ng baril kay Soriano. Noong Pebrero 19, habang pauwi siya, lumapit sa kanya ang isang lalaking nakasakay sa motorsiklo. Nang matunugan ito ni Soriano ay kaagad siyang tumalikod at nagpatuloy sa paglalakad. Subalit naabutan siya, tinutukan ng baril at inagawan ng *cellphone*. Nagbanta ang sundalo na may masamang mangyayari sa kanya kung hindi siya hihinto sa pagiging lider-estudyante.

Bago ito, dalawang myembro rin ng progresibong organisasyon sa PUP ang tiniktikan at hinaras ng militar. Ang una ay sinundan pag-sakay niya sa isang dyip at sa abot ng pandinig ng mga pasahero ay tinakot ang aktibista ng dalawang militar. Kaagad namang tumakbo ang aktibista upang makaiwas sa dalawang ahente. Ang pangalawang aktibista ay inakbayan at tinutukan ng baril habang ito ay nasa tambayan sa labas ng kanilang eskwelahan. Binantaan din siyang tumigil na sa kanyang ginagawa sa organisasyon.

Kinundena ng Anakbayan ang naturang paggigipit sa mga lider-estudyante sa PUP at iba pang unibersidad. **AB**



Hustisya para sa mga biktima ng Masaker sa Luisita

Makakamtan ng mga biktima ng Masaker sa Luisita ang hustisya, pero hindi sa ilalim ng rehimen ni Benigno "Noy" Aquino III ng Liberal Party. Ito ang pananaw ng mga kapamilya at kamag-anak ng 14 na magsasakang napaslang nang pagbabarilin sila ng mga elementong militar, pulis at pribadong gwardya ng asyenda sa gitna ng kanilang welga noong Nobyembre 16, 2004.

Pambabaluktot ng mga datos, paghahasik ng intriga. Ngayon pa lamang ay nalalambungan na ang hinahangad nilang hustisya dahil binabaluktot ang mga datos tungkol sa masaker. Tahasang sinabi ni Corazon "Dinky" Soliman, isa sa masusugid na alipures noon ni Gloria Arroyo at ngayo'y isa sa mga tagakampanya ni Noy Aquino na "dalawa lamang" daw ang napatay sa masaker sa Hacienda Luisita.


Ibig ding papaniwalain ang publiko ni "Pinky" Aquino-Abellada, kapatid ni Noy Aquino na ang mga maka-Kaliwa at hindi mga armadong bantay nilang mga pulis at militar ang may kagagawan ng "kaguluhan" sa Hacienda Luisita. Nang-intriga pa siya nang sabihin niyang ang dalawa sa mga biktima ay may mga tama ng bala sa likod. Ibig sabihin, binaril umano ang mga ito ng kanilang mga kasamang welgista.

Ang mga pahayag na ito ay malaking insulto sa mga pamilya at mga kaibigan ng mga biktima ng masaker at sa mga magbubukid sa kabuuan na nakikibaka para sa tunay na repormang agraryo. Taliwas ito sa mga ulat ng midya, sa mga sinumpaang pahayag ng mga saksi at sa mga resulta ng isinagawang imbestigasyon matapos ang masaker.

Ang mga pahayag nina Soliman at Abellada ay desperadong pagtatakip sa pananagutan at sabwatan ng pamilyang Cojuangco-

Aquino at ng rehimeng Arroyo para ikutan ang pagpapatupad ng tunay na repormang agraryo sa 4,915.75 ektarya ng kabuuang 6,443 ektaryang sakop ng asyenda. Pagtangka rin itong palabasin na ang mga asendero sampu ng kanilang mga armadong tauhan at makapangyarihang mga kamag-anak at alyado sa guberno ang siyang inagrabyado ng mga magsasaka at manggagawang bukid.

Bago pa man mangyari ang madugong kumprontasyon sa Hacienda Luisita ay nangyari na ang masaker sa Mendiola noong Enero 22, 1987 sa ilalim ng rehimen ni Corazon Cojuangco-Aquino. Habang nagmamartsa ang mahigit 5,000 magsasaka patungong Malacañang upang igiit sa rehimeng Aquino ang pagpapatupad ng tunay na reporma sa lupa ay pinaulanan sila ng bala ng mga armadong ahente ng nagpoposturang liberal-demokratikong guberno. Pagkatapos ng pu-



tukan, 13 magsasaka ang napatay at mahigit isang daang raliyista ang nasugatan. Hanggang ngayon ay wala pang nananagot sa masaker na ito.

Makaraan ang 17 taon, muling dumanak ang dugo nang tangkaing ipatupad ng maneydsment ng Hacienda Luisita Inc. (HLI) ang kautusan ng Department of Labor (DOLE) na bumalik sa trabaho ang mga welgista. Nakakuha ang pamilyang Cojuangco-Aquino ng Assumption of Jurisdiction at kautusang bumalik sa trabaho mula sa DOLE dahil may direktang linya noon ang mga Aquino kay Arroyo. Hindi sinunod ng mga welgista ang kautusan ng DOLE. Kahit armado lamang ng mga plakard, bato at tirador, pinanindigan ng mga welgista at mga tagasuporta nila mula sa mga baryong saklaw ng asyenda ang kanilang karapatan. Nilabanang nila ang dalawang tangke ng militar, 17 trak na puno ng mga sundalo, 700 pulis, isang *pay loader*, apat na sasakyang pamatay-sunog at mga is-nayper na nakapwesto sa mga estratehikong lugar. Pagkatapos magpaputok ng 1,000 bala ang pinagsanib na pwersa ng pulisya, militar at bantay ng HLI, bumulagtag patay ang 14 na welgista at 121 iba pa ang nasugatan.

Dahil sa matinding pagbatikos mula sa loob at labas ng bansa, napilitan si Arroyo na buuin ang Task Force Luisita sa ilalim ng Department of Agrarian Reform (DAR) para siyasatin ang mga usaping pinagmulan ng masaker. Nang matantyang papabor sa mga magsasaka at manggagawang bukid ang desisyon ng DAR, nagsampa ng petisyon sa Korte Suprema ang pamilyang Cojuangco-Aquino para pigilin ang paglalabas ng



desisyon nito. Nag-isyu ang Korte Suprema ng *temporary restraining order* (TRO) kaya hindi naipatupad ang desisyon ng DAR na labag sa Comprehensive Agrarian Reform Program ang ipinairal na Stock Distribution Option (SDO) ng HLI.

Ekstrahudisyal na pamamaslang. Bumalik sa kanilang piket-layn ang mga welgista pagkatapos mailibing ang mga biktima ng masaker sa Hacienda Luisita. Ngunit hindi naglaon ay sinimulan ang paisa-isang pamamaslang sa mga sumusuporta sa kanila. Mula Disyembre 8, 2004 hanggang Oktubre 3, 2006, umabot sa walo ang naitalang pinatay kaugnay ng usapin sa Hacienda Luisita:

- ♦ Marcelino Beltran, isang retiradong upisyal ng Philippine Army na naging lider-magsasaka. Nakatakda siyang magsalita sa Senado at Mababang Kapulungan tungkol sa nangyaring masaker nang pagbabarilin siya sa kanyang bahay noong Disyembre 8, 2004.

- ♦ Konsehal Abel Ladera ng Tarlac City, na namuno sa prosesyong

ng mga kamag-anak ng mga biktima ng masaker. Pinagbabaril siya noong Marso 5, 2005 habang namimili ng kasangkapan sa isang tindahan ng kotse.

- ♦ Fr. William Tadena, isang pari ng Iglesia Filipina Independiente (IFI). Regular na minomobolisa ang kanyang parokya para tulungan ang mga welgista. Binaril siya habang nakasakay sa kanyang dyip sa haywey ng La Paz, Tarlac noong Marso 13, 2005.

- ♦ Ben "Tatang" Concepcion, isang 67-taong gulang na lider ng partidong Anakpawis sa Pampanga at aktibong sumusuporta sa mga welgista. Binaril siya sa bahay ng kanyang anak sa Angeles City noong Marso 17, 2005.

- ♦ Flor Collantes, pangkalahatang kalihim ng Bayan Muna-Tarlac. Binaril siya sa kanyang karinderya noong Oktubre 15, 2005.

- ♦ Ric Ramos, pangulo ng Central Azucarera de Tarlac (CATLU). Inisnayp siya sa kanyang bahay sa Mapalacsiao, Tarlac City noong Oktubre 25, 2005. Ipinagdiriwang nila ng kanyang mga kaibigan noon

ang kalalabas lamang na desisyon ng DOLE na nag-uutos sa pamilyang Cojuangco na ibigay na sa mga manggagawa ang kanilang naipagkait na sahod sa lahat ng araw na nakawelga sila.

- ♦ Tirso Cruz, isa sa mga direktor ng United Luisita Workers Union (ULWU). Anim na beses siyang pinagbabaril hanggang sa mapatay habang pauwi kasama ang kanyang ama at dalawang kapatid noong Marso 17, 2006.

- ♦ Obispo Alberto Ramento, Supreme Bishop ng IFI. Pinagsaksak siya habang natutulog sa kanyang kwarto noong Oktubre 3, 2006.

Bukod sa walong mga pinaslang na ito, pinagbabaril din ang mga welgisting sina George Loveland at Ernesto Ramos noong Enero 12, 2005 sa kanlurang tarangkahan ng Las Hacienda Subdivision (sa loob ng Hacienda Luisita). Tinamaan sa dibdib at tiyan ang dalawa pero nabuhay sila at itinu-ro na ang mga salarin ay mga nakasibilyang badigard ng noo'y Rep. Noynoy Aquino. AB

Mga maniobra ng angkang Ampatuan

Nalantad ang pakana ng angkang Ampatuan na bayaran ang mga testigo at mga kapamilya ng mga biktima ng masaker sa Maguindanao o aregluhin ang kaso sa labas ng korte. Ayon kay Atty. Nena Santos, abugado ni Esmael Mangudadatu, ilang testigo para sa prosesyong ang binabayaran ng mga sugo ng pamilyang Ampatuan para mapahina ang kaso laban sa 19 myembro ng angkang Ampatuan na sinampahan ng *multiple murder* dahil sa pagpatay sa 57 katao, kabilang ang 32 kagawad ng midya.

Para magipit ang mga testigo at maantala ang pagdinig ng kaso, nagsampa ang mga abugado ng pamilyang Ampatuan ng iba't ibang petisyon sa korte. Habang ito'y kanilang ginagawa, unti-unti naman

nilang kinakausap ang mga pamilya ng mga biktima na sumang-ayon sa pag-aareglo.

Dahil sa iba't ibang petisyong isinampa ng mga abugado ng mga Ampatuan, walang taning na sinus-

pinde ang pagdinig ng kaso hangga't hindi pa nasasagot ang lahat ng mga ito.

Samantala, mahigpit na inirekomenda ng Initiatives for International Dialogues (IID), isang grupong nagtataguyod ng kapayapaan na bilisan ng guberno ang pagpatupad ng batas hinggil sa krimen laban sa sangkatauhan gaya ng he-nosidyo.

Sinabi ng IID sa isang pahayag na kahit napirmahan na ni Gloria Arroyo ang Republic Act 9851 o Crimes Against International Humanitarian Law, Genocide and Other Crimes Against Humanity Act mahigit dalawang buwan na ang

nakararaan, hindi pa ito naililim-bag sa dalawang pahayagang may malawak ang sirkulasyon o sa *Official Gazette*. Dahil dito, hindi pa ito maipatutupad.

Isinasaad sa reaksyunaryong konstitusyon na magkakabisa lamang ang isang batas matapos ito mailimbag sa naturang mga publikasyon.

Ayon kay Gus Miclat, *executive director* ng IID, ang naturang batas ay dumedepensa sa karapatan ng mga tao sa panahon ng eleksyon laban sa mga pagbabanta at pananakot ng mga pribadong hukbo at iba pang tipo ng ekstorsyon o panggigipit, karahasan o harassment.

Noong 2001, umabot sa 80% ng mga kaso ng karahasang may kaugnayan sa eleksyon ay kagagawan ng mga pribadong hukbo. Mayroong 132 kaso ang naitala noong 2001. Noong 2002, umabot sa 188 ang naging biktima ng karahasan sa eleksyon at noong 2007 ay 158 naman ang naging biktima. Noong 2009, pinakamatingkad na kaso ng karahasan na may kaugnayan sa eleksyon ang masaker sa Maguindano na kagagawan ng pribadong hukbo ng angkang Ampatuan.

Samantala, binabatikos ng mga pamilya ng mga kagawad ng midya na biktima ng masaker sa Maguindanao ang espesyal na pagtrato na ibinibigay ng militar kay Andal S. Ampatuan, Sr. Naha-harap sa kasong *multiple murder* ang dating gobernador ng Maguindanao.

Nakadetina siya sa isang ospital ng militar mula pa noong Disyembre 6 kahit hindi nangangailangan ng pagpapaospital ang kanyang idinadaing umanong mga karamdaman. Iginigiit ng mga karamdaman ng mga biktima ng masaker na dapat na ring ikulong sa bilangguan ang nakatatandang Ampatuan. AB




2 aksyong militar, inilunsad ng BHB sa Bulacan

Naglunsad ng magkasunod na mga aksyong militar ang Bagong Hukbong Bayan (BHB) sa Bulacan nitong unang linggo ng Marso. Pagparusa sa isang sagadsaring elementong kriminal at kontra-rebolusyonaryo ang unang aksyon nila at sinundan ito ng sabay na pagsalakay at pagsara sa dalawang kumpanyang salot sa kalikasan.

Noong Marso 2, inaresto at ginawaran ng parusa si Genaro Aguirre, batay sa atas ng rebolusyonaryong hukumang bayan. Si Aguirre ay sangkot sa serye ng panggagahasa, pagdukot, pamamaslang at pangangamkam ng lupa sa mga magsasaka sa mga bayan ng San Jose Del Monte at Norzagaray, parehong nasa Bulacan. Protektor din siya ng kumpanyang WACUMAN Sanitary Landfill sa Sityo Takad, Barangay San Mateo, Norzagaray. Ang nasabing kumpanya ay nangwawasak ng kalikasan sa pamamagitan ng ilegal na pagtatapon ng basura. Protektor din si Aguirre ng kumpanya ng tunawan ng goma sa Barangay San Isidro, San Jose Del Monte. Isa rin siyang impormer at *financier* ng PNP at ng 56th IB sa nasabing lalawigan.

Nan-laban



si Aguirre nang salakayin ng isang pangkat ng BHB ang kanyang bahay at nagresulta ito ng kanyang pagkamatay. Nakumpiska sa kanya ang isang riple at mga pistola.

Noon namang Marso 3 ng umaga, sabay-sabay na nireyd ng isang platun ng BHB ang kumpanyang WACUMAN na pag-aari ni Domingo Miralles at isang tunawan ng goma sa Area 1 Karahome sa Norzagaray na pag-aari ng isang negosyanteng Tsino. Ipinasara ito ng BHB.

Matagal nang inirereklamo ng mga residente ang mga kumpanyang ito dahil sa pagkawasak ng kalikasan sa kanilang lugar. Nagreklamo na sila sa Department of Environment and Natural Resources (DENR) at lokal na pamahalaan subalit walang ginawang hakbang ang mga ito at pinroteksyunan pa ang nasabing mga kumpanya.

Ayon sa BHB-Bulacan, nakahanda ang kanilang mga yunit na protektahan ang mamamayan sa lalawigan laban sa mga sumisira ng kalikasan.

Mahigpit nitong ipatutupad ang mga patakaran sa pangangalaga ng kalikasan at paparusahan ang sinumang lalabag dito. AB

Matatagumpay na ambus ng BHB

Labing isang sundalo ng 23rd Division Reconnaissance Company (DRC) ang napatay at pito pa ang malubhang nasugatan sa ambus na inilunsad ng Bagong Hukbong Bayan (BHB) nitong Marso 6 sa Barangay Panaytayan, Mansalay, Oriental Mindoro. Nagpapatrulya ang isang platoon ng mga sundalo na pinamumunuan ni 2Lt. Ronnie Sipsip nang tambangan sila ng mga Pulang mandirigma bandang alas-5:30 ng umaga. Ito ang pinakamalaking bilang ng mga kaswalti ng militar sa taong ito.

Agusan del Sur. Apat na sundalo ng pinagsanib na mga pwersa ng 26th IB, 23rd IB at 4th ID Civil Military Operations ng Philippine Army ang napatay kabilang ang isang tinyente nang tambangan sila ng mga Pulang mandirigma ng Larangang Gerilya 3-BHB sa Barangay La Fortuna, Veruela, Agusan del Sur noong Pebrero 24 ng gabi. Tatlong sundalo pa ang nasugatan sa ambus na ito.

Lulan ng dalawang trak ng militar ang mga tropa mula sa Barangay Bacay at papunta ang mga ito sa Barangay Sta. Josefa nang tambangan sila ng mga gerilyang bayan.

Compostela Valley. Isang tropa naman ng 25th IB ang napatay at dalawa pa ang nasugatan nang makasagupa ng mga ito ang mga Pulang mandirigma ng Larangang Gerilya 20-BHB sa Si-tyo Panon, Barangay Baylo, Monkayo, Compostela Valley nitong Marso 5.



2 milyong balota sa ARMM, walang markang panseguridad

Nabunyag kamakailan na walang markang panseguridad ng National Printing Office (NPO) ang inimprentang halos dalawang milyong balota para sa Autonomous Region in Muslim Mindanao (ARMM). Ang kawalan ng naturang mga marka, na pinangangambahang sinadya para magamit sa pandaraya sa darating na eleksyon ay kinumpirma mismo ng isang taga-NPO.

Ang naturang anomalya ay kinumpirma rin ng isang ulat ng COMELEC na tinanggap nina Archbishop Oscar Cruz at Fr. Jose Dionizon ng koalisyong Kontra-Daya.

Patakaran ng NPO na dapat taglayin ng anumang opisyal na dokumentong iniimprenta nito ang mga markang panseguridad ng ahensya para masuri kung tunay o huwad ang mga iyon sakaling magkaroon ng mga kwestyon. Anang isang empleyado ng NPO, hindi nalagyan ng kaukulang marka ang mga balota para sa ARMM dahil sa ilang naging problema sa makinang pang-imprenta. Hindi na rin daw inihabol ang paglalagay ng marka dahil sa kakapusan ng panahon.

Ani Archbishop Cruz, walang silbi ang naturang mga balota da-

hil sa kawalan ng kinakailangang markang panseguridad. Magiging madali para sa mga mandaraya sa eleksyon na kopyahin ang naturang mga balota para manipulahin ang resulta ng kauna-unahang *automated* na halalan sa bansa. Nakababahala ito lalo't ang mga probinsya sa ARMM ay kilalang balwarte ng pandaraya sa buong kasaysayan ng reaksyunaryong eleksyon sa bansa. Sa rehiyon ding iyon ginawa ng administrasyong Arroyo ang pinakamalaking pandaraya noong eleksyong 2004 at 2007.

Nananawagan ngayon ang Kontra-Daya na sunugin ang naturang mga balota sa harap ng publiko para hindi na magamit sa da-yaan.

AB

Pagsalaula sa sistemang *party-list*, kinundena

KINUNDENA ng mga progresibong mambabatas at organisasyon ang pagsalaula sa sistemang *party-list* dahil sa planong paglahok dito nina Rep. Mikey Arroyo ng Pampanga at Dept. of Energy Sec. Angelo Reyes. Ayon kay Bayan Muna Rep. Teddy Casiño, kung sinu-sino na lamang ang pinahihintulutang maging nominado ng mga *party-list group* na hindi naman tunay na kumakatawan sa anumang agrabyadong sektor sektor o grupo.

Si Reyes ay unang nominado ng 1-UTAK na grupong *party-list* na kumakatawan sa sektor ng transportasyon samantalang si Arroyo naman ay nominado ng grupong Ang Galing Party (AGP) na kumakatawan umano sa mga drayber at *security guard*.

Ang mga organisasyong ito ay ilan lamang sa itinayong mga pekeng grupong *party-list* ng Malacañang para makipag-unahan sa

pagkuha ng pwesto sa Kongreso at maharang ang mga grupong progresibo at tunay na kumakatawan sa mga agrabyadong sektor.

Sinabi ni Bayan Muna Rep. Satur Ocampo na itutulak niya ang pagbabago sa *Party-list Law* para hadlangan ang mga ganitong grupo. Magsasampa rin ng kaso ang Bayan Muna sa Commission on Election para madiskwalipika sina Arroyo at Reyes.

AB

Pakikipagdalamhati sa pagpanaw ni Jose "Apeng" Yap

NAGPAHAYAG ng dalamhati si Prof. Jose Ma. Sison at ang National Democratic Front of the Philippines (NDFP) sa pagpanaw ni Rep. Jose Yap, 81, na kanilang pinuri sa mahahalagang naiambag niya sa usapang pangkapayapaan ng reaksyunaryong gubyerno at rebolusyonaryong kilusan.

Inilarawan ni Sison si Yap bilang kaibigan at kaalyadong "may mataas na diwa ng patriyotismo at konsensyang panlipunan." Kinilala ni Sison at ng NDFP ang mga nata-tanging nagawa ni Yap sa paglingkod sa bayan bilang alkalde, mambabatas, myembro ng gabinete, pambansang ehekutibo at gu-bernador.

Tinukoy nila ang mahalagang papel na ginampanan ni Yap para mabuo ang The Hague Joint Declaration noong 1992 na siyang naging saligang balangkas ng usapang pangkapayapaan. Binanggit din nila ang naging papel ni Yap para maigpawan ang iba't ibang naging balakid sa negosasyon kung saan nakatulong nang malaki ang malaking pagtitiwala ng magkabilang panig sa kanya.

Pinuri ng Negotiating Panel ng NDFP ang tunay na pagsisikap ni Yap na kamtin sa usapan ang mapayapang solusyon sa armadong

tunggalian sa Pilipinas. Anito, "Kailanma't nakikipag-usap siya sa amin, batid at dama namin na tunay siyang nagsisikap na marating ang mapayapa at makatarungang kalutasan ng tunggalian at hindi ang pagluhod o pagsuko namin." Tinukoy din ng NDFP ang pagtutugma ng pananaw nito at ni Yap na dapat lutasin ang mga ugat ng tunggalian para makamit ang makatarungan at matagalang kapayapaan sa bansa.

Nagpahayag naman si Sison ng panghihinayang na hindi lubos na sinamantala ng rehimeng Estrada at Arroyo ang serbisyo ni Yap sa pagsusulong ng usapang pangkapayapaan. "Dapat parangalan at tularan ng sinumang susunod na presidente ng GRP ang nagawa ni Rep. Jose V. Yap sa negosasyong pangkapayapaan at sa pagbubuo ng mga makatarungan at makatwirang kasunduan sa kapakinabangan ng sambayanan," dugtong pa niya.

NDFP, nagbigay-pugay kay Josie Lichauco

NAGBIGAY-PUGAY ang National Democratic Front of the Philippines (NDFP) Peace Panel, kabilang ang mga konsultant at istap nito sa pagpanaw ni Josefina "Josie" Lichauco noong Pebrero 14 sa edad na 75. Si Lichauco ay dating myembro ng gabinete sa ilalim ng rehimeng Aquino at Ramos at aktibo sa kilusang protesta. Ani Ka Luis G. Jalandoni, tagapangulo ng NDFP Negotiating Panel, isang malaking kawalan ang pagpanaw ng isang tunay na kaibigan ng mamamayang Pilipino, isang magiting at pursigidong mandirigma para sa katarungan, karapatang-tao at mahusay na pamamahala.

Saludo ang NDFP kay Lichauco bilang walang takot na kritiko ng korapsyon sa gubyerno. Isa si Lichauco sa mga pangunahing bumatikos kay Gloria Arroyo. Matatag din siyang kumontra sa ekstrahudisyal na pamamaslang at iba ang paglabag ng rehimen sa karapatang-tao.

Mga dikta ng IMF sa susunod na pangulo ng bansa

HINDI pa man naidaraos ang pambansang halalan sa Mayo 2010 ay may idinidikta nang mga patakarang pampinansya ang International Monetary Fund (IMF) para sa magiging bagong presidente ng bansa. Ayon sa pinakahuling Country Report ng IMF, dapat palakihin ng bagong presidente ng Pilipinas ang kita ng gubyerno nito, pangunahin na sa pamamagitan ng pagpapataw ng karagdagang mga buwis.

Kaugnay nito, magpapadala ang IMF sa bansa ng "*fiscal assistance team*" para maghanda ng estratehiya para pag-ibayuhin ang pagpapalitaw ng mga bagong buwis ng susunod na gubyerno na manunungkulan sa Hulyo 2010. Ito ang komitment na pinagtibay ng IMF at ni Gloria Arroyo nang mangutang siya sa bangko noong nakaraang taon.

Sa ngayon, umaabot na ng \$52 bilyon ang utang ng Pilipinas sa IMF-WB. Ang prinsipal na utang at ang interes nito ang kumakain ng halos 70% ng kita ng gubyerno.

Matapos ilabas ng IMF ang Country Report nito, nagpahayag nitong Marso 1 si Benigno "Noy-noy" Aquino III, kandidato ng Liberal Party sa pagkapangulo na malamang ay magpapataw siya ng ba-

gong mga buwis kung siya ang magiging presidente ng bansa. Biglang pagbaligtad ito sa ipinangako niya noong Enero sa harap ng mga negosyante sa Makati na hindi siya magpapataw ng mga bagong buwis. Siya lamang sa mga kandidato sa pagkapresidente ang nagpostura noon na lalaban sa mga dikta ng mga imperialistang bangko.

Iginigiit ng IMF sa susunod na administrasyon na kumbinsihin nito ang Kongreso na magpataw ng mas matataas na buwis. Kabilang sa mga itinutulak ng IMF ang pagpapataas ng buwis sa tabako, alak at iba pang inumin.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 5
Marso 7, 2010
www.philippinerevolution.net

Editorial

Mga epekto ng El Niño, pinasisidhi ng bulok na sistema at mga patakaran

Kalilipas lamang ng magkasunod na sakuna, dagdag na pinsala at paghihirap na naman ang dinaranas ng mamamayang Pilipino, laluna ng masang magsasaka. Ito ay bunga ng mas maaga, matindi at mahabang tagtuyot na dala ng El Niño.


Kakaibang sidhi ang epekto nito sa mamamayan dahil sa pag-iral ng bulok na naghaharing sistema at mga anti-mamamayang patakarang nagbibigay-daan sa pandarambong ng malalaking kapitalistang dayuhan, kumprador at burukrata. Masahol pa, hindi lamang naging pabaya at inutil ang mga naghahari sa harap ng kalamidad, sinasamantala pa nila ito ngayon para pakinabangan nila at ng kanilang mga kasapa-

kat. Pangunahing pinipinsala ngayon ng tagtuyot ang umaabot sa 750,000 ektaryang mga sakahan, palaisdaan at mga hayupan na nakasalalay sa patuloy na suplay ng tubig. Kabilang dito ang mga prubinsya sa Northern Luzon na napinsalaan ng matitinding bagyo nito lamang huling bahagi ng 2009. Tinatayang P10-20 bilyong halaga ng mga pananim, palaisdaan at alagang hayop ang mapipinsala sa mga darating na buwan.

Ang sidhi ng epekto ngayon ng tagtuyot ay ibinubunsod pangunahin ng matagal nang pagkawasak ng mga likas na rekurso ng tubig. Nangatuyo o nangababaw ang mga ilog, bakawan, sapa, balon at iba

pang tubigan dahil sa malawakang pagdambong sa mga bundok at kagubatan ng malalaking kumpanya sa pagmimina at pagtotroso. Sa gayo'y walang magamit na reserbang tubig ang masang magsasaka para sa mga taniman, palaisdaan at pag-aalaga ng hayop.

Malala pa, ang tubig na naiipon sa mga dam na nagagamit noon sa irigasyon ay ipinagkakait ngayon ng malalaking kapitalistang nagmamay-ari nito. Tumatagti ang mga ito na magpakawala ng tubig dahil ang limitado nang suplay ay ipinaprayoridad nila sa produksyon ng kuryente na siyang pangunahin nilang pinagkakakitaan. Walang pakialam ang mga ito sa salan-



Mga tampok sa isyung ito...

Industriya ng biofuels, pinagpipistahan
PAHINA 5

Pabuya sa mga nag-aresto sa Morong 43, binatangos
PAHINA 7

2 aksyong militar sa Bulacan
PAHINA 10

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com